

ერი და ისტორია

(დოქტ. ბაქრაძის ნაშრომის გამო საქართველოს ისტორიაზე)

ჩვენ არა ერთხელ გვითქვამს, რომ ერის პირქვე დამხობა, გათახსირება, გაწყალება იქიდან დაიწყება, როცა იგი თავის ისტორიას ივიწყებს, როცა მას ხსოვნა ეკარგება თავისი წარსულისა, თავისი ყოფილის ცხოვრებისა, დავიწყება ისტორიისა, თავისი წარსულისა და ყოფილის ცხოვრების აღმოფხვრა ხსოვნისაგან — მომასწავებელია ერის სულით და ხორციით მოშლისა, დარღვევისა და მთლად წაწყმედისაცა. წარსული — მკვიდრი საძირკველია აწმყოსი, როგორც აწმყომომავლისა. ეს სამი სხვადასხვა ხანა, სხვადასხვა ეამი ერის ცხოვრებისა ისეა ერთმანეთზედ გადაბმული, რომ ერთი უმეოროდ წარმოუდგენელი, გაუგებარი და გამოუცნობია. ამიტომაც არის ნათქვამი ერთის ბრძნისაგან, რომ აწმყო, შობილი წარსულისაგან, არის მშობელი მერმისისათ. ეს სამთა ეამთა ერთმანეთზედ დამოკიდებულება კანონია ისეთივე შეურყეველი და გარდუვალი, როგორც ყოველივე ბუნებური კანონი.

ბევრს ერს ქვეყანაზედ სულაც არა ჰქონია წარსული, სულაც არა ჰქონია ისტორია, ესე იგი იმისთანა ცნობიერი ცხოვრება, რომელიც გამოსახავს ხოლმე სულიერს და ხორციელს ვინაობას ერთიანის კრებულისას, მის მიზიდულებას, მის აზრს და საგანს არსებობისას, მის წმიდათა-წმიდას, და რომელიცა მკის თავის დროებისათვის და ამასთანავე სთესს მერმისისათვის. ამისთანა ხალხნი დღესაც ბევრნი არიან ქვეყანაზედ. ამის-

თანა ხალხი უბინაო კაცსა ჰგავს, რომელმაც არ იცის — ვინ არის, რისთვის არის, საიღამ მოდის და სად მიდის, ამიტომაც ესეთი ხალხი ბევრით არ გამოირჩევა პორუტყვთაგან და იქნება ბევრში უკანაც ჩამოურჩება. უღმობელი კანონი ისტორიისა ამისთანა ხალხს ვერ დაინდობს ეხლანდელს დროში, და სხვა უფრო ძლიერის ისტორიის მქონე ერი დაეძგერება თუ არა, თანაც გაიტანს და შეიწირავს ხოლმე ამისთანა ხალხსა.

თუ ესეთი არა, ბევრი მეტი აღარ არის იგი ერი, რომელსაც ისტორია ჰქონია და იგი ისტორია დაუვიწყნია; აღარც ამისთანა ერსა აქვს მკვიდრად მოკიდებული ფეხი არსებობისათვის საჭიდაოდ, იმიტომ რომ, რა იყო — ის დავიწყებული აქვს და, მაშასადამე, რა არის — არც ის იცის. არ იცის რა გაიმაგროს, რისთვის გაიწიროს თავი, რას გამოესარჩლოს და რას არა, ფეხ-ქვეშიდამ გამოცლილი აქვს ის მაგარი მიწა, იგი ტანი თავის ვინაობისა, რომელსაც ისტორია შეადუღებს ხოლმე მამა-პაპათა ნალვაწ-ნამოქმედარისაგან საშვილიშვილოდ ფეხმოსაკიდებლად და მოსამაგრებლად. იგი დიდება, იგი სახელი, რომელსაც ამისთანა ერი ჩაინარჩუნებს ხოლმე წარსულისაგან თავის გულში, თავის სამღერალსა და საგალობელში, თავის ზღაპრებსა და მოთხრობებში, მართალია, ბევრს ანუგეშებს ხოლმე ჭირსა და ლხინში, მაგრამ, რაც დრო მიდის, ეგ ნუგეშიც, ისტორიის დავიწყებასთან ერთად, წელდება და თანდათან ჰქრება. იმიტომ რომ სამღერალსა და საგალობელში, ზღაპრებსა და მოთხრობებში ჩარჩენილნი სახსოვარნი, ისტორიის დავიწყების გამო, მართალს აღარა ჰგვანან და უაზრო და უსაგნო ზღაპრადღა გარდაიქცევიან, როგორც მოქმელის, აგრეთვე გამგონის თვალშიაც. ამის გამო ამ სახსოვრებში ის ცეცხლ-მოსაკიდებელი ძალ-ლონე აღარ არის, რომელიც კაცს ააფეთქებს ხოლმე მოქმედებისა და გარჯისათვის, და რაკი ეს არ არის, ყოველი ეს განძი და საუნჯეც-კი, წარსულისაგან გადმოლოცვილი, ამო და ფუჭია ერის გამხნევებისათვის, ერის დღეგრძელობისათვის.

თუნდ ეგეც არ იყოს, შვილმა უნდა იცოდეს, სად და რა-ზედ გაჩერდა მამა, რომ იქიდან დაიწყოს ცხოვრების უღელის

წავა. შეიღს უნდა გამორკვეული ჰქონდეს, რაში იყო მართალი და კარგი მისი მამა, რაში იყო შემცდარი, რა ავი მიიჩნია კეთილად, და რა კეთილი—ავად, რა უმართავდა ხელს, რა აბრკოლებდა, რისთვის ირჯებოდა და მხნეობდა, და რისთვის და რაში უქმობდა. უამისოდ თითონ შეიღი, რაც გინდა მხნე და გამრჯელი იყოს, უხორთუმო სპილოს ეგვანება. დავით გურამიშვილისა არ იყოს, და ამ წუთისოფელში ვერას გახდება.

ჩვენ ვრს ორი ათასი წელიწადი უცხოერია ისტორიელის ცხოვრებით. ბევრი მაგარი და ბევრიც უეარგისი ქვა ჩაუდგია იმ საძირკველში, რომელზედაც დღეს ჩვენი აწმყოა დამუარებული მერმისის ამოსაგებად. რომ მართლა ესეა, ამისი საბუთი თუაღწინ გვაქვს. რა შეგვინახავდა ამ ერთ მუქა ხალხს ამ ორიათას წელიწადს ამოდენა დაუძინებელ მტრებს შორის. რათ და როგორ შეგვარჩენდა ხარბობა უცხო თემთა ამ მშვენიერად შემკულს წაღკოტსა, რომელსაც საქართველოს ეძახიან, თუ ჩვენს წარსულს ჩვენის ცხოვრების საძირკველში მაგარი ქვა არ ჩაედგა. ეს ერთის მხრით, მეორეს მხრით — რა ჩამოგვარჩენდა ასე უწყალოდ სხვა ქვეყნებსა ან განათლებასა, ან გამდიდრებაში, თუ ამისთანა ქვეყნის პატრონთა ცხოვრების საძირკველში მაგარ ქვასთან ერთად უუარგისი და ფხენილი ქვაც არ ჩაეყოლებინა ჩვენს ისტორიას.

რომელია სიმაგრე ჩვენის ცხოვრებისა და რომელი სიფუფე და სისუსტე, ამას ხსნის და გვითარგმნის ხოლო მარტო ისტორია, და თუ იგი დავივიწყეთ, მამ დაგვივიწყნია ჩვენის ცხოვრების სათავეც. ჩვენის ცხოვრების ფესვი, ჩვენის ცხოვრების საძირკველი, და თუ ასეა — რაღაზედ უნდა დაეამყარათ ჩვენი აწმყო, ჩვენი მერმისი? არ არის არც ერთი მხარე ჩვენის ცხოვრებისა, როგორც სხვისაც, რომ რაიმე წარსულის ნაშთი ზედ არ შერჩენოდეს, ხოლო ამ ნაშთისა დღეს ჩვენ აღარა გაგვეგება რა, ვიმეორებთ, იმიტომ, რომ დავიწყებული გვაქვს მისი ამხსნელი და გამმარტებელი ისტორია. ამიტომაც ჩვენ ბევრში უთავბოლოება გვეტყობა, არაფერი საქმე არ გუხერხდება, აქეთ და იქით ვასკდებით თავს-ბრუ-დახვეულ ქცივით და ვერა გამოგვიტანია რა. ეს უქმად წარმავალი ვარ-

ჯა ჩვენი, უქმად წარბლომილი მხნეობა და ცდა, ქანცს უწუ-
ვტავს გამრჯელს და მის მაყურებელს ერს ხომ გული უტყ-
დება, თავის-თავზე სასოება და იმედი ეკარგება, და აქედამ განა-
ღიდი მანძილიდაა სრულად განადგურებამდე!

გარდა ყოველ ამისა, ბევრჯერ გვითქვამს და ეხლაც
განვიძეოვრებთ, რომ ისტორია იგი დიდებული ტაძარია, საცა
უწირავს ერთიან სულსა ერისას და საცა აღუმართავს ერს თა-
ვის დიდებული და დიდ-ბუნებოვან კაცთა უწმინდესნი ხატნი
და ზედ წარუწერია დიდთა საქმეთა მოთხრობა, ვითა საშვილო-
შვილო ანდერძი. ერი, რომელსაც ახსოვს ეგ თავისის ერთიან-
ის სულის წირვა, ეგ თავის დიდ-ბუნებოვანნი კაცნი და დიდ-
თა საქმეთა ამბავი, კეთდება, მხნევდება, ჭგულოვანდება და
თავმოწონებულია ყველგან, ჭირია თუ ლხინი. ამ ღირსებათა
პატრონი ერი არ დაუვარდება, არ დაუძაბუნდება არავითარს
ზედმოსეულს უბედურებასა და განსაცდელსა. იგი გულგაუ-
ტეხელად იბრძვის. იღწვის, გამხნევებული თავის მამა-პაპის
მაგალითითა და ანდერძითა, და მართო გულგაუტეხელი მეტრ-
ძოლი დაინარჩუნებს ხოლმე ბურთსა და მოედანს ამ წუთი-
სოფელში.

დიდ-ბუნებოვან კაცთა და სახელოვან გმირთა მაგალითე-
ბით ისტორია სწურთნის ერსა, ზრდის, და დიდებულნი საქმენი
კიდევ გულს უკეთებენ მოქმედებისათვის, აქეზებენ, ამხნევე-
ბენ, თუ ნამეტნავად ის მაგალითები ერის საკუთარის ისტორი-
ისანი არიან. ერი თავის გმირების ცხოვრებითა და მაგალითე-
ბით უნდა მსულდგმულობდეს, თუ მართლა ერობა ჰსურს და
აგრეც არის, საცა ერი ერობს. აბა შეხედეთ სხვა ქვეყნებს, ერ-
თი იმისთანა სახელოვანი კაცი არა ჰყოლიათ, რომ მის საბ-
სოურად ძეგლი არა ჰქონდეთ აღმართული? რისთვის? სულ
იმისთვის, რომ დიდმა თუ პატარამ დაიხსომოს თავისი სახე-
ლოვანი კაცი, სულ მუდამ თვალ-წინ იყოლიოს და მის მიბაძ-
ვას ეცადოს.

ეს მრავალგვარი მნიშვნელობა ისტორიისა ერის გამოცოც-
ხლებისათვის კარგად იცოდნენ თავის ერის გულშემატკივარ-
თა სხვა ქვეყნებში. იგი სახელოვანნი მამულისშვილნი, ყველა-

ზედ უწინარეს, ერის გამოკეთებისათვის დაიწყოებულის ისტორიის აღდგენას შეეცადნენ. გამოღვიძებამ ერისამ უგემურის ძილისაგან ყველგან აქედამ დაიწყო თავისი დასაწყისი, და ამ-გზით გამოფხიზლებულ ერის კეთილდღეობასა და ხელახლად აღორძინებას დღეს ბევრგან ჩვენის თვალთ ეხედავთ.

ჩვენ გვწამს ესეთი სასწაულთმოჭმელება ისტორიისა და ამიტომაც დიდის სიხარულით ვეგებებით იმ ამბავს, რომ ჩვენს დაუღალავ მოღვაწეს ბ-ნს დ. ბაქრაძეს განუზრახავს ჩვენის დაიწყოებულის ისტორიის აღდგენა და გახსენება. „ივერიაში“ დაბეჭდილის პროგრამისაგან სჩანს, რომ ბ-ნ ბაქრაძეს სანატრელის სიღიღით შემოუფარგლავს თავისი საგანი ასე, რომ თუ პროგრამა შესრულდა, ჩვენ, ქართველებს, ხელთ გვექნება მთელი დიდი და ვრცელი სურათი ჩვენის აწ დაიწყოებულის წარსულისა. ვისაც-კი გაეგება რამ, სიხარულით აღტაცებულნი მოუთმენლად მოვლიან იმ დღეს, როცა დაიბეჭდება ეს ისტორია, ვითარცა დიდს დღესასწაულს რასმე. მართალნიც არიან.

შემოხსენებულისაგან ცხადად დაინახავს ჩვენი მკითხველი, თუ რა დიდსა და სახელოვან ღვაწლსა და სამსახურს სდებს ბ-ნი ბაქრაძე ჩვენს ერს, ჩვენს ქვეყანასა. კიდევ ვიტყვი, აღდგენა ისტორიისა — ერის გამოცოცხლება, გამომხნევება აწმყოს გაგება და წარმართვა, მერმისის გამორკვევა სიბნელისაგან. ყოველ ამ დიდ სიკეთის მომნიჭებელი იქნება ჩვენი პატრიცებელი ბ-ნი ბაქრაძე, რომელსაც მადლობელი ერი და დავალებელი ქვეყანა თავის-დღეში არ დაივიწყებს თვისთა სახელოვანთა კაცთა შორის. ღმერთმა ისე კეთილად შეასრულებინოს ეს სასახელო განზრახვა, როგორც თვითონ ბ-ნ ბაქრაძეს და მისთა კეთილმოყოფელთა მსურდეს და, სხვათა შორის, ჩვენცა.